

AWIG –AWIG DESA ADAT TIHINGAN

**KECAMATAN BANJARANGKAN
KABUPATEN DAERAH TINGKAT II
KLUNGKUNG**



**KASURAT OLIH :
KRAMA DESA ADAT TIHINGAN
TAHUN 1987**

MURDA – CITA

Om Awighnamastu Nama Sidham

Saking wara nugraha Ida Sang Hyang Perama Wisesa, mawinan presida sinurat awig-awig Desa Adat Tihingan puniki, gumantinnia kdasarín antuk pasuara gilik seguluk saha kayun suci nirmala, ening tanpata leteh.

Awig-awig gumanti maka uger-uger pemargi, mangda prasida mikukuhang kesukertan jagat miwah krama desa adatnia tur kesungkemin antuk Dharma, Prawertinnia ngerajegang Sang Hyang Aji Agama manut deresta.

Sewosan ring dresta inucap pamekas Pancasila lan Undang-Undang dasar 1945 miwah sahananing uger-uger sane kawedarang olih Sang Amangku Rat taler tan kalempasin antuk daging awig-awig puniki.

Mogawastu kasidan mikolihang manut patitisnia.

Om Ksama sempurna ya namah swaha

“Om Shanti – Shanti – Shanti Om”

**PIDAGING
MAKA BANTANG AWIG-AWIG
DESA ADAT TIHINGAN**

MURDA CITTA

	WIDANG
SARGA I ARAN LAN WEWIDANGAN DESA	4
SARGA II PETITIS LAN PEMIKUKUH	5
SARGA III SUKERTA TATA PEKRAMAN	5
PALET 1. INDIK WARGA LAN KRAMA DESA	5 - 10
PALET 2. INDIK PRAJURU / DULUN DESA	10 - 12
PALET 3. INDIK KULKUL	13 - 14
PALET 4. INDIK PARUMAN LAN SANGKEP	14 - 16
PALET 5. INDIK DRUWEN DESA	16 - 17
PALET 6. SUKERTA PAMITEGEP	17
KAPING 1. KARANG, TEGAL LAN CARIK	17 - 18
KAPING 2. PEPAYONAN	18 - 19
KAPING 3. WEWANGUNAN	19 - 20
KAPING 4. WEWALUNGAN	20
KAPING 5. BAYA LAN DUSTA	21 - 22
KAPING 6. PENYANGGRAN BANJAR	22 - 23
SARGA IV SUKERTA TATA AGAMA	23
PALET 1. INDIK DEWA YADNYA	23 - 27
PALET 2. INDIK RESI YADNYA	27 - 28
PALET 3. INDIK PITRA YADNYA	28 - 31
PALET 4. INDIK MANUSA YADNYA	31 - 32
PALET 5. INDIK BHUTA YADNYA	32 - 33
SARGA V SUKERTA TATA PAWONGAN	33
PALET 1. INDIK PAWIWAHAN	33 - 35
PALET 2. INDIK NYAPIAN	35 - 36
PALET 3. INDIK SENTANA	36 - 37
PALET 4. INDIK WARISAN	37 - 39
SARGA VI WICARA LAN PAMIDANDA	39
PALET 1. INDIK WICARA	39 - 40
PALET 2. INDIK PAMIDANDA	40 - 41
SARGA VII NGUWAK NGUWUHIN AWIG-AWIG	41 - 42
SARGA VIII PEMUPUT	42 - 43
LAMPIRAN-LAMPIRAN	43
LAMPIRAN INDIK PANITIA PENYURATAN AWIG-AWIG	43 - 44

SARGA I
ARAN LAN WEWIDANGAN DESA
Pawos 1

1. Desa Adat punika mewasta Desa Adat Tihingan.
2. Desa Adat Tihingan mewates nyatur sekadi ring sor :
 - a. 2.1. Wates Kaler : Desa Adat Pau
 - b. 2.2. Wates Kangin : Tukad Toya Jinah lan Banjar Mungguna
 - c. 2.3. Wates Klod : Desa Adat Penasan
 - d. 2.4. Wates Kauh : Tukad Mati

Pawos 2

1. Desa Adat Tihingan puniki kewangun antuk karang ayahan Desa, Carik lan tegal sane merupa paumahan tur kepah kedadosang Banjar-Banjar :
 - a. Banjar Kanginan
 - b. Banjar Kawan
2. Desa Adat Tihingan ngawengku :
 - a. Pura-pura :
 1. Pura Dalem Gede
 2. Pura Puseh
 3. Pura Dalem Setra
 4. Penyimpenan
 5. Padmasari
 6. Pemerajan
 7. Pura-Pura Dadia
 8. Pura Paibon
 - b. Pekarangan :
 1. Pekarangan Desa utawi tanah Banjar lan telajakannia.
 2. Tanah carik Desa.
 3. Tanah pekarangan paumahan, tegal muah carik.
 - c. Margi lan rurung :
 1. Margi ke carik Bang
 2. Margi ke carik Pegulingan
 3. Margi ke carik Tibu
 4. Margi ke Pura Dalem Gede
 5. Margi ke Tukad Toya Jinah
 - d. Tukad utawi Telabah :
 1. Tukad Toya Jinah
 2. Tukad Peletan
 - e. Setra luire :
 1. Setra Ageng
 2. Setra Alit

Pawos 3

Wewidangan Desa Adat Tihingan kagenahin antuk :

- a. Krama Desa : mewed luire :
 1. Krama pengarep
 2. Krama arirang
 3. Krama keputungan
- b. Krama pengumbaran utawi tamiyu

SARGA II

PETITIS LAN PAMIKUKUH

Pawos 4

Desa Adat Tihingan ngemanggehang, dasar / pamikukuh :

1. Pancasila sekadi sinurat ring Pembukaan Undang-Undang Dasar Negara Indonesia Warsa 1945.
2. Undang-Undang Dasar Negara Republik Indonesia warsa 1945 pemekas pasal 18, Undang-Undang miwah Peraturan-peraturan Negara Republik Indonesia sane seosan.
3. Tri Hita Karana manut cara Agama Hindu.

Pawos 5

Petitis Desa Adat Tihingan taler mikukuhang miwah ngerajegang :

1. Sang Hyang Agama.
2. Nginggilang tata prawertine me-Agama.
3. Ngerajegang kesukertanning Desa saha pawongannya sekala lan niskala.

SARGAH III

SUKERTA TATA PEKRAMAN

Palet 1

INDIK WARGA LAN KRAMA DESA

Pawos 6

1. Sane kebawos warga Desa Adat Tihingan, inggih punika sehananing Sang sane jumenek ring wewidangan Desa Adat Tihingan sane meagama Hindu tur satinut ring sehananing daging awig-awig Krama Desa Adat Tihingan.
2. Sane kebawos Krama Desa Adat Tihingan inggih punika, Sang sane sampun merabian utawi nyelidii ayah me-Agama Hindu, ngemong karang Desa utawi tan ngemong karang Desa.

3. Warga sane mewed utawi mewiwit saking Desa Adat Tihingan, magenah ring dura desa sangkaning ngerereh pengupa jiwa lan wigunania kangkat nedunin mekrama Desa ring Tihingan, kewannten mungguing swadarmania manut perarem Desa Adat.
4. Yening wenten saking dura Desa sampun merabian, sareng jumenek ring Desa Adat Tihingan ngantos sasihan patut katedunang mekrama Desa Adat, indik swadarmania manut perarem.
5. Yening wenten saking dura Desa sampun merabian, sareng jumenek ngantos sasihan kewannten saking sasudian Sang Angawerat patut ngemiletin pasukadukan krama.
6. Seosan sekadi inucap ring ajeng kebawos tamiyu.

Pawos 7

Krama Desa Adat Tihingan kepalih dados :

1. Krama ngarep : inggih punika krama sane mewiwit pawiwahan tur presida ngayah memungkul.
2. Krama Arirang lanang / wadon : inggih punika krama sane pecak ngarep ketinggal olih raka utawi rainnia tur medue tapukan lanang utawi istri. Yening tapukan punika sampun tutug yusa wenang kebulangkepang ayahnia.
3. Krama bulangkep inggih punika : Krama sane pecak ngarep ninggalang oka lanang lan istri sampun tutug yusa / duwur wenang kebulangkepang ayahnia sekadi krama desa ngarep.
4. Krama Tapukan lanang utawi istri : inggih punika krama sane ketinggal yayah rena.
5. Krama unggu : wenten kalih palet :
 - a. Krama unggu lanang : inggih punika krama sane ketinggal olih rainnia madue tapukan lanang.
 - b. Krama unggu wadon : inggih punika krama sane ketinggal olih rakannia madue tapukan istri.

Pawos 8

Kawit dados krama Desa Adat Tihingan luire :

1. Sahananing sane ngemong karang desa utawi tan ngemong karang desa saking keluluhurannia jumenek ring Desa Adat Tihingan.
2. Mewed saking desa seosan jumenek ring desa adat Tihingan tur petilarnia sangkaning rahayu melarapan ngerereh karya / pengupa jiwa miwah sane sewosan.
3. Mewiwit pawiwahan wiadin pratisentana sekadi ucaping 1, 2 ring ajeng.

Pawos 9

Panemaya tedun mekrama Desa Adat Tihingan : meduluran antuk penerangan saking prajuru desa adat marep ring krama sane pacang katedunang, nganutin pemargi sekadi ring sor :

1. Satunggil sasih kesanga sane mewiwit saking pawiwahan.
2. Mewaneng tigang sasih yening mewed saking desa sewosan petilarnia sangkaning rahayu seduluran antuk supeksa ilakita ring prajuru desa adat.
3. Yening mejalaran antuk nyelosang ayah-ayahan utawi nyundulang ayah-ayahan ring pratisentanannia padgata kala / pramangkin tan kawentenang penerangan.
4. Sane kawenangang nyelosin inggih punika sentana lanang sane pinih dumun merabian.
5. Warga desa kengin ngemargiang ayah-ayahan krama yening sampun meyusa 17 tahun / warsa.

Pawos 10

Swadarmaning krama desa :

Sahananing krama lan warga desa keni ayah-ayahan pinaka darmaning Krama lan warga desa luih ipun :

1. Sang sinanggeh sampun dehe utawi teruna patut ngemargiang ayah penyalah (teruna-teruni) manut wigunannia mekadi : seke teruna – teruni, seke gong, seke pragina, seke kidung miwah sane sewosan.
2. Nyungkemin sehananing tetiwak saking sang angawa rat minakadi : nawur tigasana (pajeg), KB, wajib belajar, sekaa pande gong lan sane sewosan.
3. Krama ngarep keni peson-peson lan ayah-ayahan memungkul.
4. Krama arirang keni peson-peson lan ayah-ayahan apah kalih saking krama ngarep.
5. Krama bulangkep keni peson-peson lan ayah-ayahan sekadi krama ngarep.
6. Krama unggu lan tapukan sane sampun tutug yusa, keni peson-peson sekadi krama arirang sejawaning urunan pewangunan keni apah pat saking krama ngarep.

Pawos 11

Indik Pepatusan krama desa

Swadarmaning krama desa adat manut pepatusan desa, banjar utawi tempekan.

Pepalihan patus wenten tigang palet :

1. Patus Kelayuan
2. Patus Ngaben Dadakan
3. Patus Ngaben Masa

ad. 1. Pemargin patus kelayuan sekadi ring sor :

Patus artha berana kemedalan antuk sowang-sowang Krama Desa Adat merupa beras lan jinah akwehnia manut perarem, tan kebinayang sekadi pawos 7 ring ajeng.

ad. 2. Pemargin patus ngaben dadakan sekadi ring sor :

Patus artha berana memargi pateh sekadi patus kelayuan.

Mungguing penyanggran karya manut pinunas sang medruwe karya.

ad. 3. Pemargin patus ngaben masa sekadi ring sor :

- a. Nembenin tedun makarya manut pinunas sang medruwe karya.
- b. Medal-medalan Krama Desa luih ipun : gesing asiki, kelangsah akuub, kelapa asiki.
- c. Indik pekaryan lan reruntutannia manut pinunas sang medruwe karya.
- d. Mungguhing patus ajengan sowang-sowang krama keni sami abungkul sejawaning Ida Meraga Brahmana keni sami kekalih, seantukan tan keni reramuan, ayah-ayahan, lan tetegenan, nanging polih penyandang krama.
- e. Dane meraga Tri Wangsa sane sinanggeh Pre Dewa keni ajengan kekalih keni reramuan lan ayah-ayahan tan keni tetegenan polih penyandang krama.
- f. Dane meraga Tri Wangsa sane sinanggeh Pre Gusti keni ajengan asiki keni reramuan lan ayah-ayahan tan polih penyandang krama, tan keni tetegenan, sakewanten reramuania kebakta rauh ring banjar.

Pawos 12

1. Satunggil krama desa wenang mepuangkid / tan tedun rikala :
 - a. Mepuwangun, ngerebin, meyadnya, nandur, metepetin, keluwasan merangkat sungkan, ngingsirang pepayonan mejalaran antuk atur supeksa ring Prajuru adat.
 - b. Galah inucap kengin wantah apisan, sejawaning wenten wakwakan saking Prajuru utawi dulun desa.
 2. Nyada utawi ngemademang ayah risampun mayusa 60 ngantos 70 warsa.
 3. Mopog / ngayah antuk artha berana seantukan megenah ring dura desa metilar sangkaning rahayu, melarapan ngerereh pengupa jiwa utawi kesudian Sang Angawa Rat.
 4. Mopog arirang lanang utawi wadon sane metilar sangkaning rahayu, melarapan ngerereh pengupa jiwa utawi kesudian olih Sang Angawa Rat.
- Indik gung arta memopog inucap manut perarem krama desa.

Pawos 13

MERARIAN MEKRAMA DESA ADAT LUIRE :

1. Sangkaning padem / seda.
2. Sangkaning pinunas ngeraga duaning :
 - a. Sungkan banget tahunan kengin merarian makekalih kewanten yening kesinang kaonan (padem) patut keambil olih ikrama sepatutnia.
 - b. Kesah kedura desa sangkaning patut kedulurin ilakita saking prajuru.
 - c. Sangkaning kenorayang antuk ikrama desa seantukan tan prasida ngentosin salah, prawertinnia, tur setata nguwig kecaping daging awig-awig nanging dados mewali mekrama desa yening sampun :
 1. Nunas pengampura tur kekeninin jinah ular-alir manut perarem.
 2. Nawur penuku manut kewentenan kas desa adat.

3. Merarian utawi kerariyanang antuk ikrama panemayannia padgata kala, utawi ngawit putusan perarem.
4. Mewali malih mekrama desa, sangkaning rahayu tan kepatutang keni penaub wewangunan druen desa sane sampun memargi sakewanten keni pinuku pekaad mara, yening wenten jinah kas, patut ketawurin.

Pawos 14

SWADARMANING TAMIU

TAMIU :

1. Sang sinanggeh tamiu inggih punika :
Sang sapa sira ugi sane rawuh saking desa sewosan utawi saking dura negara jumenek mererepan ring desa adat Tihingan senistannia awengi.
Upaminnia mawiwit saking :
 - a. Kesudian desa utawi Sang Angawa Rat.
 - b. Kedaut warga utawi kaluwarga antuk sinalih tunggil krama.
 - c. Ngerereh pengupa jiwa.
 - d. Mesunulang raga / mekedihang raga.
 - e. Duduk-dudukan.
 - f. Melelungayan.
 - g. Mecikang tetangguran (gong).
2. **SWADARMANNIA KADI KECAP RING SOR :**
 - a. Nginutin sahananing pemargin kerta lan tata ketreptian Desa Adat Tihingan.
 - b. Sang sinanggeh tamiu utawi krama sane kerawuhin tamiu patut atur supeksa ring prajuru adat lan selantur ipun.
 - c. Yening itamiu utawi ikrama sane kerauhan tamiu nenten matur ring prajuru adat lan selantur ipun, patut keni pamidanda manut perarem.
 - d. Yan wenten tamiu tan nganutin pratingkahing kerta lan kesutreptian Desa Adat Tihingan wenang ketundung saking wewidangan Desa Adat Tihingan utawi keni pamidanda manut perarem, yan tan nganutin patut keaturang ring sang Angawa Rat.

Pawos 15

Indik pemargin krama desa manut petitis Desa Adat Tihingan lan ngemanggehang dresta manut kewantenan linggih krama, wenten papalihan manut wigunannia taler kewentenang leluputan ring :

- a. Ida meraga Brahmana : Tan keni onekan utawi ayah-ayahan lan reramuan.
- b. Para Pemangku desa : Tan keni onekan, ayah krama lan reramuan miwah urunan yadnya.
- c. Krama sane cedangga banget lan sungkan tahunan, lanang utawi wadon kedadosang mopog antuk arta, yan sane sungkan wenten pinunas ipun merarian mekrama Desa Adat, taler kedadosang.

- d. Hansip, Pengabih widang wewangunan miwah sane seosan manut wigunannia tan keni ayah krama, lan reramuan.
- e. Sekaa gong tan keni reramuan, saha tan keni ayah krama yening wenten pemargi sinarengan.
- f. Dane meraga Tri Wangsa sane sinanggeh Pra Dewa lan Pre Gusti tan keni saya balung sakewanten ritatkala wali ring Dalem ngaturang sajeng soang-soang kalih pucung.

Palet 2

INDIK PRAJURU / ULUN DESA

Pawos 16

1. Desa Adat Tihingan keenter antuk Bendesa Adat / Prajuru Desa Adat.
2. Banjar utawi tempekan keenter antuk kelian Banjar / Tempekan.
3. Bendesa lan kelian Banjar / tempekan patut :
 - a. Keadegang satunggil limang masa (5 tahun) melarapan antuk pasuara gilik ring peparuman.
 - b. Sejawaning wenten pari indik seos, keangkat / kesudi malih.
 - c. Maduluran antuk upasaksi ring Pura Bale Agung utawi Pura sane sewosan.
 - d. Dasar-dasar Sang patut kerajegang :
 1. Mewiwit saking krama desa ngarep.
 2. Rahajeng tur mepolah rahayu.
 3. Me-Agama Hindu.
 4. Uning menyurat lan ngewacen.
 5. Uning ring pengelokika.
 6. Tan naanin kenorayang
 7. Tan cedangga.

Pawos 17

1. Bendesa Adat kesanggra antuk :
 - a. Petajuh pinaka wakilnya.
 - b. Penyarikan pinaka juru surat.
 - c. Petengen pinaka pengamong druwen desa.
 - d. Kestinoman pinaka juru arah.
 - e. Kelian Banjar / Tempekan pinaka pengeromba.
2. Kestinoman akehnya manut kawigunan saha megilir nyabran asasih.
3. Sejeroning ngenterang kesukertan niskala, yadnya ring Kahyangan desa, ngupekara kesucian Kahyangan desa, lan sehanannia keenter antuk Bendesa Adat, tur ketuntun olih : Ida Sang Sulinggih, para Pemangku Desa, lan Parisada Hindu Dharma.

Pawos 18

SWADARMANING PRAJURU DESA ADAT

1. Swadarmaning Bendesa Adat luire :
 - a. Ngenterang pemargin daging awig-awig miwah perarem desa adat.
 - b. Nuntun tur ngenterang krama rauhing warga desa, ngupadi kesukertan krama desa manut petitis.
 - c. Maosin kalih niwakang pemutus arep ring wicara warga desa.
 - d. Maka duta desa matemuang bawos ring sapa sira ugi.
 - e. Maka pamenggala desa, ritatkala mikukuhang desa, pemargin desa kalih awig-awig, prade wenten wong dura cara kalih pengerusak saking dura desa.
 - f. Ritatkala ngenterang pemargin desa utawi krama, IBendesa adat patut ngawentenang :
2. Wewirasan ring para prajuru sane sewosan, pengabih widang tetanggungan kalih para yogya sane taler ngewidangin warga desa, upamina Perbekel, Kelian Subak miwah sane sewosan, mangda tan tungkas pemargi.
3. Prajuru sane sewosan swadarmannia :
 - a. Mewirasa ring para sami prajuru.
 - b. Pateh manut swadarmaning Bendesa, nganutin paetangan wawengkon wawidangannia, kalih wipunannia.
 - c. Pinaka tangan suku, pengeromba pinih ajeng olih I Bendesa Adat.
4. Prade I Prajuru iwang sesana utawi ngulinyokang druwen desa, Banjar / Tempekan, keni kebuktian keiwangannia antuk ikrama punapi malih yen banget tempal ring daging awig-awig lan pasuara patut :
 - a. Keni pamidanda nikel ring swang-swang krama.
 - b. Keni penaur kerugian arta marep ring desa, Banjar / Tempekan.
 - c. Kengin kerarianang dados Prajuru.
5. I Prajuru sane kesisipang, tan kengin ngenterang kalih nuntun perareman krama duk punika. Perareman krama ketuntutn antuk Prajuru Sewosan, utawi Pengabih prajuru sane lianan manut sesudian perarem.

Pawos 19

Petias utawi olih-oli Prajuru / dulun desa luire :

- a. Luput rerampen utawi peson-peson.
- b. Polih cenengan luire dum-duman kalih tanding.
- c. Polih duman arta (enced-encedan) atanding tengah.
- d. Tan keni peturunan sejawaning peturunan wewangunan.
- e. Petias sewosan manut perarem.

Pawos 20

INDIK SINOMAN :

Kewentenan Sinoman ring Desa Adat Tihingan luire :

Sinoman Desa Adat, Banjar / Tempekan.

SWADARMANING SINOMAN :

- a. Ngemargiang seluiring arah-arang sane kapituduh saking Bendesa, utawi keliannya soang-soang.
- b. Ritatkala tedun mekarya sinoman patut ngabih pemargin Prajuru utawi keliannya soang-soang.
- c. Ngemedalang banten capah lan cane, ring paruman Desa, Banjar / tempekan, ritatkala pacang nimbalang dados sinoman, yan tan ngemedalang capah lan cane patut keni pamidanda 33 (tigang dasa tiga) wiji jinah bolong.
- d. Ritatkala ngemargiang arah-arang I Sinoman tan kengin mapituduh ring anak sane durung dados ngayahang Desa, taler tan wenang ngerauhang arah-arang ring anak alit sane durung tatas ring indik pemargin krama.
- e. Ritatkala I Sinoman ngemargiang arah-arang, yan sang kearahin utawi keluargannia sane patut kearahin tan wenten ring puri, sinoman wenang ngenahang sawen antuk busung makacihna sampun ngerauhang arah-arang.
- f. Yan ISinoman lali ngerauhang arah-arang ring sinalih tunggil krama Desa, Banjar / Tempekan wenang I Sinoman keni pamidanda akuehnia manut pamidanda sang kearahin, sakewanten maduluran antuk supeksa ring Prajuru Adat.

Pawos 21

NGENTOSIN PRAJURU

1. Prajuru / dulun desa kagentosin riantukan :
 - a. Sampun putus sengker dados prajuru utawi sampun panemayannia.
 - b. Kelayonan, Sang Prajuru lampus utawi seda.
 - c. Tan sida ngemargiang pemargi dados prajuru seantukan sungkan tahunan utawi pialang abot sane sewosan.
 - d. Pinunas ngeraga tur sampun kelugra pinunasnia antuk ikrama desa, banjar / tempekan.
 - e. Kerarianang antuk ikrama dwaning iwang pemargi.
2. Ngentosin utawi ngerarianang prajuru patut keraremin antuk ikrama desa, banjar / tempekan, sejeroning perareman tur, kewentenang pengilakitaan sane kesahang, tur kesaksinin antuk prajuru sane luhuran.

Palet 3
INDIK KULKUL
Pawos 22

1. Kulkul utawi gendongan ring Desa Adat Tihingan, wenten sekadi ring sor :
 - a. Kulkul krama Desa Adat lanang.
 - b. Kulkul Desa Adat wadon.
 - c. Kulkul Banjar utawi tempekan.
 - d. Kulkul sekehe gong, sekehe Teruna-Teruni lan sekehe-sekehe sane seosan sane merupa anak-anaking Desa Adat.
 - e. Kulkul sekehe-sekehe dadia.
 - f. Kulkul sekehe-sekehe sane seosan.
2. Suaraning kulkul inucap pinaka cihna atur, mantuk ring krama desa sami, Banjar utawi tempekan miwah sekehe-sekehe sane seosan manut pasubayannia.
3. Suaran kulkul soang-soang inucap ring ajeng pastika manut tetujon, tur manut ring pasubaya krama.
4. Pemargi-pemargi sane patut macihna antuk suaran kulkul luire :
 - a. Peparuman.
 - b. Tedun mekarya.
 - c. Wali lan Yadnya sane seosan.
 - d. Pacang ngupasaksi warga sane ngerangkat.
 - e. Pacang ngerentebin utawi mapitulung ring Sang kelayuan.
 - f. Tatkala kepancabaya.
 - g. Nyanggra surat pengerauh Sang Angawarat.
5. Cihna pesuaran kulkul ring Desa Adat Tihingan manut sekadi ring sor :
 - a. Peparuman miwah tedun mekarya, wali, Yadnya lan reruntutannia, nyanggra sepengerauh Sang Angawarat (kalih tuludan sedeng).
 - b. Pinaka upasaksi warga ngerangkat (kalih tuludan sada gancang) kulkul kesuarayang ritatkala sampun nyaluk wengi olih Prajuru Desa Adat.
 - c. Kelayu sekaran :
 1. Makecihna seda (tigang kelentungan lambat).
 2. Ngemedalin patus, ngerancang, mangbang (atuludan sedeng).
 3. Mepeningan utawi mebersih (petang kelentungan lambat).
 4. Mendem (limang kelentungan lambat).
 5. Pitra Yadnya (manut sekadi kelayuan).
 - d. Cihna baya :
 1. Jiwabaya upami keamuk, kebaak, kepandungan, yuda miwah sane lianan (atuludan bulus).
 2. Baya seosan minekadi : genibaya, kebelabar, anyud, linuh, miwah sane lianan (lambat panjang).
 3. Mendak utawi nyineb Ida Betara-Betari, Surya kegera, bulan kepangan (Suaran kulkul nyangsih).

Pawos 23

1. Kulkul desa tan wenang kesuarayang yening tan sangkaning pituduh Prajuru / Dulun desa sejawaning tetenggeran kepanca bayaan.
2. Kulkul Banjar / Tempekan lan kulkul sekehe-sekehe sane seosan, tan wenang kesuarayang yening tan sangkaning pituduh prajurunnia swang-swang sejawaning tatenggeran kepanca bayaan.
3. Yan ritatkala kesuarayang kulkul desa, banjar utawi tempekan miwah sekehe-sekehe sane sewosan, tan wenang kesaurin antuk suaran kulkul pekubon, utawi pondokan-pondokan sejawaning tetenggeran kepanca bayaan wenang sinalih tunggil krama, nyuarayang kulkulnya swang-swang raris kesaurin antuk suaran kulkul sane lianan.
4. Sang nyuarayang kulkul yan tan sangkaning pituduh prajuru, desa, banjar, tempekan miwah sekehe-sekehe sane sewosan patut digelis atur supeksa maka pebuatnia ring prajurunia soang-soang.

Palet 4

INDIK PARUMAN LAN SANGKEP

Pawos 24

INDIK PEPARUMAN :

1. Peparuman ring desa adat Tihingan wenten :
 - a. Peparuman Prajuru desa kewentenan manut wiguna.
 - b. Paruman desa kewentenan :

Setunggil Buda Kliwon, maka cihna tanpa arah-arah dwaning sampun tetep panemaya manut perarem krama desa.
 - c. Sangkepan Banjar / Tempekan kewentenang :
 1. Nyabran ngesasih manut perarem banjar / tempekan soang-soang.
 2. Napkala (padgata kala) majalaran arah-arah manut tetujon.
 - d. Paruman sekehe-sekehe manut pabuatnia.
2. Paruman desa, banjar utawi tempekan lan sekehe-sekehe, pemarginnia manut sekadi ring sor :
 - a. Keduluran antuk pengarah perade padgata kala.
 - b. Mahcihna antuk pesuaran kulkul manut pawos 22 (kalih likur).
 - c. Abusana nyelempot saha tan kelugra makte seluiring gegawan.
 - d. Meserana janggi maka pengawit tedun ikrama, kelanturang antuk pengonek, mangda prasida peparuman inucap ketembenin.
 - e. Presida lumaksana risampun ketedunin olih atengah langkung antuk ikrama sane patut ngemiletin.
 - f. Tan maren ngarcana ring Begawan Penyarikan, meserana antuk banten cane lan reruntutannia.

- g. Pinaka pemungkah peparuman kakawitin antuk atur Penganjali umat “Om Swastiastu”.
- h. Sejeroning peparuman tan kelugra sinalih tunggil ikrama ngewentenang suara : gora, biyuta, utawi medal saking peparuman tan sadu ring prajuru yan ana mangkana keni biya pamidanda pengewa-ewa gung arta 250 (satak seket) wiji jinah bolong.
- i. Yan ana sinalih tunggil krama tan pepegatan ngantos ping tiga tan tedun tur tan wenten sadu ring prajuru indik kepialangnya patut keni pamidanda 250 wiji jinah bolong.
- j. Pemutus kebawosan keutsahayang mangda gilik seguluk, pada arsa krama sami.
- k. Bilih tan presida sekadi ring ajeng, pemutus kebawosan ngangge pesuaran sane akehan, nanging putusan punika taler mangda manut utawi tan banget lempas ring daging awig-awig, pematut agunge minakadi Pancasila lan Undang-undang dasar 1945.
- l. Putusan peparuman inucap sinanggeh maka uger-uger pamitegep daging awig-awig gaguat tata pangenter desa adat, banjar utawi tempekan, miwah sekehe-sekehe sane sewosan manut dresta.
- m. Peparuman keusanang antuk tur pemuput Prama Santi “Om Shanti, Shanti, Shanti Om.....”.
- n. Risampun wusan peparuman tur pemutus bebawos sampun kesungkemin antuk ikrama, tan kelugra ikrama ngerabrab malih daging peparuman, yan ana mangkana patut keni pamidanda gung arta 250 (satak seket) wiji jinah bolong.

Pawos 25

Sane patut kesiarang ring paruman desa, banjar utawi tempekan miwah Sekehe-sekehe sane sewosan luire :

- a. Munjuk lungsuring krama, saha ayah-ayahan.
- b. Saluiring sulur arta berana druwen desa, banjar utawi tempekan miwah sekehe-sekehe sane sewosan.
- c. Indik pemargi sane wus keputusang utawi wewangunan.
- d. Rencana prajuru ngenenin usaha desa sane kepungkur.
- e. Sehana wicara saha pemutusnia.
- f. Sehananing sane kesiarang ring ajeng patut ketitenin saha ketiwakin pemutus antuk Ikrama soang-soang.

Pawos 26

SANGKEPAN PRAJURU :

- 1. Sangkepan prajuru utawi Dulun Desa magekuat sekadi ring sor :
 - a. Kawentenang sanistannia tigang sasih apisan utawi padgata kala manut wiguna yening wenten bawos sane buat.
 - b. Katuntun antuk Bendesa utawi Kelian Adat.
 - c. Kasarengin olih Prajuru sami miwah pengabih widang Tetangunan, utawi manggala-manggala sane sewosan manut wiguna.

2. Tetujon peparuman Prajuru inggih punika :
Ngerincikang pangerencana tata upaya sane patut anggen, ritatkala pacang ngelaksanayang sehananing pemargi, utawi rencana pewanungan ring desa adat.
3. Pemutus sahananing rencana punapi malih rencana sane niwakin kenan-kenan utawi pemargi ring krama, tan wenang ngelaksanayang sedurunge kesungkemin tur kapikukuhang antuk paruman desa adat.
4. Sangkepan Prajuru mawit saking pituduh Sang Angawa Rat utawi mewiwit pesuara krama desa sane riinan.

Pawos 27

1. Sangkepan Banjar / Tempekan miwah sekehe-sekehe sane sewosan tan wenang lempas kadi petitis daging awig-awig miwah keputusan desa sane sampun kesungkemin.
2. I Prajuru Banjar / Tempekan miwah sekehe-sekehe sane sewosan ritatkala ngangken ngewentenang sangkepan utawi ngardi keputusannia, mangda atur supeksa riin ring Prajuru Desa Adat.

Palet 5

INDIK DRUWEN DESA

Pawos 28

Sane kasinanggeh druwen Desa Adat Tihingan kadi ring sor :

1. Kahyangan / Pura-pura luire :
 - a. Pura Dalem
 - b. Pura Puseh
 - c. Pura Dalem Rajapati
 - d. Pura Pesimpangan Bale Agung
 - e. Pura Padmasari
 - f. Penyimpenan
2. Pratima-Pratima
3. Setra wenten kekalih luire :
 - a. Setra Ageng
 - b. Setra Bajang
4. Tanah-tanah pelinggih pura saha telajakannia.
5. Tanah pelinggih balai desa adat lan telajakannia.
6. Tanah tegal 1175 m² lan 1140 m².
7. Tanah carik 6900 m² lan 3400 m² (laba Pura Puseh lan Pura Dalem Tihingan).
8. Tanah-tanah pekarangan sane tan mepipil.
9. Margi utawi rurung desa.
10. Tetangguran / gong abarung.

11. Sahananing sane kadruwe antuk desa / banjar patut kapiara utawi kepahayu antuk ikrama desa/banjar maka ping ajeng olih Prajuru desa / banjar.
12. Prajuru desa / banjar wenang ngetangang druwen desa / banjar manut wigunania.
13. Sahanan druwen desa / banjar patut keunggahang ring ilakita sane pasti olih prajuru desa / banjar saha pareindikannia.

Palet 6

INDIK SUKERTAN PAMITEGEP

Kaping : 1

KARANG, TEGAL LAN CARIK

Pawos 29

1. Tanah pekarangan desa utawi tanah paumahan, mepipil yadian tan mepipil patut keayahang utawi mekrama Desa Adat Tihingan.
2. Yang wenten sinalih tunggil Krama Desa Adat pacang matimbalang utawi nyiwadanaang tanah pekarangan desa sane tan mepipil (tan keni tigasana) patut polih wak-wakan saking warisnia, taler polih pemutus olih Prajuru Desa Adat.
3. Sahanan wewilangan karang, tegal lan carik sane wenten ring wewidangan Desa Adat Tihingan patut kewatesin antuk tembok, pepagehan miwah pal saking Agraria, tur kesaksiang antuk Prajuru Desa Adat. Wates sisi kaler miwah kangin, taler sane namping rurung patut kekaryaning tur kedruweyang olih sang madruwe karang mangda pekantenane asri.
4. Pemedal kerurung utawi kemargine tan wenang kebebeng, taler mangda kewehin sang embah utawi penguwus toya, Penguwus toya punika kepatutang kepelemahan sane andapan nanging mangda kepiara olih sang nganggen mangdene tan ngerauhang pikobet ring anak sewos.
5. Yening pacang mekarya jempeng, kandang wewalungan miwah genah jejemuhan busana tan kedadosang nampek ring wates Parahyangan, pemerajan utawi Pura.
 - Peembang jempeng sareng Pemerajan, Parahyangan utawi Pura paling kidik a meter (1 meter).
 - Peembang kandang wewalungan sareng Pemerajan, Parahyangan utawi Pura manut daging pawilangan sang medruwe kandang arep ring sang medruwe pemerajan, Parahyangan utawi Pura inucap.
 - Peembang genah jejemuhan busana sareng Pemerajan, Parahyangan utawi Pura margi utawi rurung patut nganggen pengelokika mangdene tan kantos ngeletehin anak sewosan.

Pawos 30

1. I Krama Desa Adat tan kelugra ngalahang tanah pekarangan, tegal lan carik druwen anak sewos, napimalih sane kedruwe antuk desa adat sekadi : Kahyangan, Setra, Banjar miwah sane sewosan.
2. Prade wenten sekadi ring ajeng sang ngalahang wenang ngewaliang tanah inucap saha keni pamidanda manut perarem, tur kewewehin pengupa kara yening ngalahang genah-genah sane kasinanggeh Suci.
3. Yan wenten anak sane medruwe karang peumahan ring wewidangan Desa Adat Tihingan, sakewanten nenten nyarengin mekrama Desa ring Desa Adat inucap seantukan sampun tedun mekrama desa ring Desa Adat sewosan, kepatutang sang medruwe karang peumahan keni :
 - a. Pahayu jagat manut kadi daging perarem.
 - b. Ayah ritakala nyanggra pekaryan Pemerintah Agung (Gotong – Royong).
4. Sahananing karang, tegal lan carik patut mangda meguna marep ring sang neruwenang, taler tan ngewenang kedukitan anak sewos.

Kaping : 2

PEPAYONAN

Pawos 31

1. Yening wenten sinalih tunggil Krama Desa Adat pacang nandur tanem tuwuh nampek ring genah Parahyangan wiadin paumahan, peembang ipun saking penyengker ngetengahang paling kidik adepa agung (2 meter).
2. Yan wenten kekayonan kepitahen carang lan daun ipun ngelintangin Parahyangan utawi paumahan anak sewos wenang kesepat gantungan.
3. Prade kekayonan punika kapitahen pacang ngerauhang baya ring anak sewos, ngungkulin, akah ipun ngerusak tembok penyengker wiyadin tembok wewangunan kekayonan punika, kangkat ketundung.
4. Pemargine nyepat gantung wiyadin nundung mangda ngelaksanaang sekadi ring sor :
 - a. Sang jaga nyepat gantung utawi nundung pinih rihin mangda ngewentenang bebawos ring sang medruwe kekayonan punika.
 - b. Yening sang medruwe kekayonan punika tan nguwehin pacang nyepat gantung utawi nundung, wenang sang ngewara mesadok ring Prajuru Desa Adat, Prajuru Desa Adat raris memawosin sang medruwe kekayonan inucap.
 - c. Yan sampun kewehin nyepat gantungan utawi nundung, pemargine mangda sekadi ring sor :
 - c.1. Petitis sekala lan niskala melarapan mekarya perantos lan upacara bebanten.
 - c.2. Kesarengin olih sang medruwe kekayonan.
 - c.3. Kesaksiang antuk Prajuru Adat.
 - d. Prebeya sepat gantung wiyadin nundung ketawur olih sang ngewara, wangke, carang, daun lan buah, keserahang ring sang medruwe.

5. Prade disampune kebawosang olih Prajuru Adat taler tan kewehin wekasan yan kekayonan punika ngerawuhang : mis, kekotoran wiyadin ngerubuhin sang ngewara, kepatutang sang medruwe kekayonan punika mersihang, mecikang tur ngupacara wewangunan sane kerubuhin.
6. Prade wenten anak ngebah taru sampun ngemargiang upakara banten lan tragia prantos, kesarengin olih sang medruwe kekayonan tur sampun kesaksiang antuk Prajuru, risampune kelaksanayang raris ngerubuhin wewangunan anak sewos, ritatkala punika sane kepatutang ngemedalan prabeya lan pengupakara sareng tiga (sang nundung, sang melaksana ngebah ring sang medruwe kekayonan).
7. Sakewanten yan wenten anak ngebah taru nenten ngemargiang sekadi inucap ring ajeng, yan pekaryane ngerawuhang baya ring wewangunan anak sewos, rikala punika sane kepatutang ngemedalang prebeya lan pengupakara sang ngerubuhin.
8. Semalihne yan wenten taru pungkut ke tegal utawi carik anak sewosan, prade ngerusak tetanduran, pepagehan, tegal utawi carik sane keungsi, wenang sang medruwe tarune sane pungkut punika kebi penebus, agung ipun manut kadi pengelokika Prajuru Adat.
9. Yan wenten taru pungkut utawi carang, daun lan buah ulung ring sajeroning karang utawi tegal sane mepagehan rapi, tan kangkat ke jarak utawi keambil sejabaning olih sang medruwe. Sakewanten yan karang utawi tegal punika nenten mepagehan rapi (melumbar) wit lan carang tan kangkat keambil.
10. Prade wenten taru nampek ring pekarangan utawi peumahan nenten ketundung seantukan pekantenane nenten pacang ngerawuhang baya raris midep pungkut tur ngerubuhin pekarangan utawi peumahan anak sewos, sang medruwe taru punika tan kangkat keni prebeya sakewanten tarune sane ngelintang wenang ketaban olih sang ketetehang (baya tan keneng wilangin).
11. Yan wenten tetanduran entikan ipun ngelimbak utawi ngelintang kepekarangan wiyadin tegal, carik anak sewos, wenang ketaban olih sang medruwe karang, tegal lan carik sane keungsi olih entikan punika.
12. Krama Desa Adat kepatutang taler mangda nyanggra kewardian tanem tuwuh sane ngawinan desane asri tur lestari (Memelihara Lingkungan Hidup).

Kaping : 3

W E W A N G U N A N

Pawos 32

1. Sinalih tunggil Krama Desa sane pacang ngewangun tan kepatutang nyapcapin wiyadin nyayubin, napimalih toyan ipune kekecorang kepekarangan utawi peumahan anak sewos.
2. Yening pacang ngewangun merupa wewangunan adat, mangda nganggen sukat kadi dresta (Astha Bumi, Astha Kosala Kosali miwah sukat sewosan), manut petitis sekala lan niskala.

3. Yening pacang mekarya rurung, linggah ipun kepatut pinih malit tiga pah lima depa agung (1,20 m) tur kedarin antuk paiguman olih sang pacang ngewangun rurung ring sang medruwe tanah sane keanggen rurung.
4. Yan pacang ngenahang barang padruwean ring margi utawi rurung, tan kedadosang kantos tan wenten galah memargi tur lamin ipun wantah arahina.
5. Saluiring margi utawi rurung sane wenten ring wewidangan Desa Adat Tihingan patut kapiara olih sang nganggen, yan tan kapiara kangkat keambil pemiaraan ipun olih Krama Desa Adat.
6. Tan wenang mewangun sejeroning margi / rurung.
7. Prade wenten kekayonan sinanggeh naonin utawi ngerawuhang baya marep ring margi utawi rurung, wenang kekayonan inucap kesepat gantungin wiyadin ketebteb olih sang medruwe. Prade tan kekaryaning patut keni pamidanda manut perarem.
8. Warga Desa Adat taler mangda nyanggra kebersihan jagate, tan kedadosang ngentungang luhu utawi kekotoran ring jelinjing, telabah, rurung utawi margi, taler genah-genahe sane kesinanggeh suci. Murug kecaping ajeng patut keni pamidanda manut perarem.

Kaping : 4

W E W A L U N G A N

Pawos 33

1. Sahanan Warga Desa Adat Tihingan sane miara wewalungan mangda seyaga nitenin wewalungannia upami : Negul, ngelogor, mangdene tan ngerusak karang, tegal utawi peabianan krama sewosan, napimalih kantos ngeletuhin Kahyangan.
2. Prade wenten wewalungan melumbar utawi galak tur ngerusak pekarangan utawi peabianan ring sampune kepelungguhang tur kewara malih ngerusak druwen anak sewos, kengin ketaban tur kesadokang ring Prajuru. Prajuru wenang mamidanda sang nerebenang tur kepatutang nawur penebus kerusakan, geng ipun manut pengelokika.
3. Yening ngeletehin genah suci ring sampune keparitetes olih Prajuru sang nerebenang patut keni danda, prebeya sane rusakang tur meweweh pengupakara genah suci, patut kadi linggih Agama.
4. Sang miara wewalungan taler tan kewenang ngenahang, negulang utawi ngang-ngonan wewalungan ipun ring genah-genah kadi ring sor :
 - a. Genah-genah Suci rawuh kepekarangan Banjar utawi Bale Desa Adat.
 - b. Margi agung, rurung ring Desa.
 - c. Pekarangan desa rawuh telajakannia.
 - d. Setra-setra.Sang murug kecaping ajeng, keni pamidanda manut perarem.
5. Manut pidabdab Pemerintah Agung, Krama Desa Adat taler mangda nyanggra kelestarian wewalungan miwah sarwa prani.

Kaping : 5

BAYA LAN DUSTA

Pawos 34

1. Sahanan laksana tan rahayu sane mewesana ngawinang pekobet ring anak sewos utawi krama desa adat kesinanggeh baya.
2. Sane kesinanggeh baya luire :
 - a. Jiwa Baya
 - b. Raga Baya
 - c. Artha Baya
 - d. Geni Baya
 - e. Duracara Agama

Pawos 35

1. Sinalih tunggil Warga Desa sane uning ring jadma pacang melaksana tan rahayu utawi Warga Desa ketiban baya, mangda digelis matur supeksa ring Prajuru wiyadin Pemerintah Agung.
2. Prade sinalih tunggil Warga Desa ketiban baya agung, sang ketiban baya wiyadin sang amangguh baya inucap wenang digelis nyuarayang kulkul tur matur supeksa ring Prajuru utawi Pemerintah Agung.
3. Sahanan Warga Desa patut mapitulung sane kecihnayang antuk suaran kulkul, saha ngawa gegawan manut sekadi kewentenan baya inucap, mangdene sang keni baya sida digelis polih ketulungan.

Pawos 36

1. Yan pacang meserep utawi ngeledahin ritatkala kepandungan, kepegandang utawi ngicalang raga, pemargine sejeroning wewidangan Desa Adat Tihingan, patut nunas penguak ring Prajuru tur mangda Prajuru taler nyarengin.
2. Meseserep ring sewos bebanjaran utawi Desa Adat, patut polih penguak olih Sang ngawiwenang banjar utawi Desa Adat inucap.
3. Sehanan tingkahe meseserep mangda ketuntun olih Prajuru manut sekadi daging awig-awig.

Pawos 37

1. Sehanan jadma melaksanakan tan rahayu sane ngawinang baya ring anak sewos utawi Krama Desa Adat, patut keni pamidanda manut perarem, tur katur ring Pemerintah Agung.
2. Prade sane rusak utawi sane kepondung arta sane kasinanggeh Suci sewos ring keni pamidanda kepatutang taler keni penyangaskara, pemeriyascita muah sane sewosan manut kadi linggih Agama tur katur ring Pemerintah Agung.
3. Yan sang melaksana tan rahayu mawit saking dura desa, prade keni ke ejuk patut ketahan raris katur ring Prajuru Adat utawi Pemerintah Agung.
4. Prade wenten warga desa ngerereh reramon daun, buah lan carang sane kederuwe soang-soang utawi sane kedruwe antuk Desa Adat, sedurunge ngerereh mangda mesadok riyin ring sang medruwe utawi Prajuru Adat.
5. Yan tan mesadok ngerereh reramon sekadi inucap ring ajeng, prade kecunduk olih sang medruwe soang-soang utawi Krama Desa Adat, wenang kedanda manut perarem.
6. Yening mepengarah kepekubon wiyadin kepeumahan mangdene tan katuwekang rikala sang medruwe pekubon wiyadin peumahan kaicalan barang , pemargine mepengarah mangda sekadi ring sor :
 - a. Sedurunge ngeranjing kepekubon wiyadin paumahan mangda ngewentenang tetenggeran suara (mekaukan).
 - b. Yan tan kesaurin olih sang medruwe pekubon wiyadin paumahan, pemedale patut kedagingin sawen.
7. Yan wenten jadma nguman-nguman minekadi wak parusia, wakcepala, kroda, mayuda ring sangkepan, ring pura-pura, patut keni pemitanda manut kadi perarem tur meweweh pengupakara manut kadi genah.

Kaping : 6

PENYANGGRAN BANJAR

Pawos 38

1. Sinalih tunggil Krama Desa Adat Tihingan pacang ngewentenang yadnya merupa yadnya ala utawi yadnya ayu kesanggra olih Krama tempekan, Banjar utawi Krama Desa Adat manut pinunas sang meyadnya.
2. Yening yadnyane punika merupa karya ala upami kematian, seda, Krama Tempekan, banjar utawi Krama Desa Adat patut ngeromba sang keni kelabubaangan manut kadi perarem.
3. Prade yadnyane punika merupa Pitra Yadnya, ngaben utawi pelebon, sang meyadnya kedadosang nunas karya ring Krama Tempekan, Banjar utawi Krama Desa Adat manut sekadi pinunas, sakewanten wantah pang tiga (3).
4. Selangkung ipun ritatkala Krama Tempekan, Banjar utawi Krama Desa Adat mapitulung ring sang medruwe karya, sesajine (pengingune) sesidan-sidan.

5. Indik pemedalan (patus) manut sekadi sane sampun kasinurat tur kesungkemin olih Krama Desa Adat sinamian.

Pawos 39

1. Warga Desa Adat utawi Pemerintah Agung ritatkala ngewangun yadnya utawi karya sane sewosan taler kedadosan nyelang genah rawuh alat-alat sane wenten manut kadi pinunas utawi pengarsanne sang mabuat.
2. Indik pemargine nyelang genah utawi alat-alat sane wenten tur dados keanggen sekadi ring sor :
 - a. Sang mebuatan mangda matur utawi ngewentenang arsa ring Kelian Tempek, Banjar utawi Prajuru Desa Adat.
 - b. Upakara banten sane patut katur ritatkala ngewangun karya, mangda kekaryanin olih sang nganggen tur lungsurane kewaliang ring sang medruwe aturan.
 - c. Sang mebebuatan mangda periksa ring genah utawi alat-alat sane keanggen prade risampune wusan keanggen wenten sane rusak utawi ical mangda kebecikang utawi kepeselangan.
 - d. Yening yadnyane punika merupa karya ala, taler mangda kewewehin pemeriyastista, genah utawi alat-alat sane keanggen.
 - e. Sang nganggen kepatutang taler keni batu-batu manut kadi perarem yening genah wiyadin alat-alat sane keselang keanggen ngerereh dana (prebeya).

SARGA IV

SUKERTA TATA AGAMA

Palet 1

DEWA YADNYA

Pawos 40

Pura-pura sane wenten tur keempon olih Krama Desa Adat Tihingan miwah kewentenan puja walinnia sekadi ring sor :

1. **PURA KAHYANGAN TIGA**
 - a. Pura Puseh : pujawalinnia ring rahina Redite Wage Kuningan.
 - b. Pura Dalem : pujawalinnia ring rahina Buda Umanis Medangsia.
 - c. Pura Pesimpangan Bale Agung : redite Wage Kuningan (sinarengan duk wali ring Pura Puseh).
2. **PURA DALEM RAJAPATI**

Pujawalinnia ring rahina Saniscara Kliwon Wayang.
3. **PURA PADMASARI**

Pujawalinnia ring rahina utawi nyabran Purnama Kedasa.

Ring sowang-sowang Pura Desa Adat inucap sekadi ring ajeng wenang kewentenan pemangku sane pacang ngenterang / nuntun sehananing yadnya utawi pengastawa ring pura-pura inucap.

Pawos 41

Wiwitannia sang dados pemangku luire :

- a. Mewiwit saking keturunan pemangku ring pura inucap.
- b. Yan tan hana wenang nyanjan.
- c. Sesudian Krama Desa Adat.
- d. Sang cedangga (sang amumpang paranin laku, tan wenang laku) tan wenang dados pemangku.
- e. Kesungkemin olih Krama Desa manut dresta.
- f. Pewintenannia kepuputang olih para sulinggih utawi Ida Peranda.
- g. Yan sampun wus pawintenannia wenang ngerangsuk gegelaran pemangku, patut kaping singgih manut wigunannia ngemargiang swadarmaning pemangku, tur tan ngelempasin sastra lan agama.

Pawos 42

Swadarmaning Pemangku luire :

- a. Aswaka dharma, astiti bakti ring Ida Sang Hyang Widhi.
- b. Ngenterang wiyadin ngastawayang sehanan upakara ring pura ritatkala patirtaan, utawi yadnya sane sewosan.
- c. Ngelaksanayang sane mabuat suci ring pura, kalangin nedunang utawi ngunggahang ida Bhatara.
- d. Pemangku-pemangku Desa wenang nyiratang tirta ring Krama desa manut dresta tan wenten bilihnia, sejawaning ring Ida meraga Brahmana.
- e. Nganutin tata kramaning dados pemangku widhi, patut ngusuma Dewa.
- f. Pemangku istri kewenang ngenterang pandidikan banten upakara, ageng wiadin alit, manut pemargine ring pura-pura Desa Adat.
- g. Pemangku paibon utawi Pemerajan kewenangannia wantah ring Paibon utawi Pemerajan sowang-sowang.
- h. Para pemangku sejeroning mawicara, tan kepatut muputang upakara.
- i. Ring sampune puput ngajengin pawicaran, patut Mrascita raga, kesaksinin antuk Prajuru Desa Adat.

Pawos 43

1. Ritatkala wenten yadnya ring Pura-pura Desa Adat, pemangku pura inucap patut polih pengeromba saking pemangku-pemangku desa sane sewosan, tur patut niwakin pituduh marep ring pemangku pengeromba inucap.
2. Rabin sowang-sowang Prajuru, patut ngeromba yadnya ring pura-pura, utawi ring Desa Adat.

3. Yan prade pemangku sane marep keni kapialang, patut pemangku pura desa sane sewosan ngelaksanayang upakara ring pura inucap.
4. Yan hana pemangku keni ujar ala, pemangku inucap patut keprayastista manut agama, tur sang nguwehin ujar ala keni pamidanda manut perarem desa adat.
5. Yan hana pemangku kebuktiang amungpang paraning laku, tan manut laku, tan wenang kesepuh, patut kegentosin, tan kari dados pemangku.

Pawos 44

Wates Pura ring Pura Dalem

Sane kebawos pura lan jaba kerta ring Pura Dalem inggih punika : sejeroning candi bentar, tur sejaba candi bentar mewates tigang (3) depa agung (6 meter). Sejeroning wates inucap tan wenang ajejudan.

Pawos 45

Aturan-aturan sane manjing ring pura :

- a. Aturan-aturan pedagingan patut kadruwe olih pura-pura inucap.
- b. Sahanan sang sane maturan ring pura inucap, patut mesadok ring Prajuru Adat aturan inucap patut keunggahang ilikita, tur keuningang ring paruman Krama Desa Adat.
- c. Sahanan aturan kadi kecap ring ajeng, wenang keanggen ring pura inucap manut tetujon.

Pawos 46

Piodalan lan aci ring Pura.

1. Pura-pura sane keempon olih Krama Desa Adat sekadi kecap ring ajeng, piodalannia manggeh amadia, ngenem sasih, sejabaning Padmasari ngemasa apisan nemonin Purnama Kedasa.
2. Indik Ida Bhatara nyejer ritatkala wali tur masineb kadi ring sor :
 - a. Wali ring Pura Dalem, Ida Bhatara ngadeg tigang rahina ring Pura Dalem, ring penyimpanan ngadeg malih arahina, raris nyineb.
 - b. Wali ring Pura Puseh, Ida Bhatara ngadeg tigang rahina raris nyineb.
 - c. Wali ring Pura Dalem Prajapati, Ida Bhatara ngadeg arahina raris masineb.
 - d. Yan ring Padmasari, Ida Bhatara ngadeg tigang rahina, raris nyineb.
 - e. Wali ring pesimpangan bale Agung, sinarengan ring wali Pura Puseh.
3. Ring Pura Kahyangan Tiga sane keempon olih Krama Desa Adat, patut kawentenang masupatinin pedagingan masue dasa warsa apisan, manut ring wali Pura sowang-sowang.

4. Ritatkala wali ring Kahyangan Tiga patut ngaturin Ida Pedanda pinaka pemuput yadnya.

Pawos 47

Kesukertan Kahyangan sekadi ring sor :

Sahananing Krama Desa Adat patut nureksain raga mangda kasukertan Kahyangan polih kasucian :

1. Sane tan kelugra ngeranjing kepura kahyangan desa kadi ring sor :
 - a. Sane sinanggeh cuntaka inggih punika : kewentenan sane ngeletehin utawi sane nenten suci manut Agama Hindu luire :
 1. Sebel kandel ngeraga sewala, selami durung mebersih.
 2. Sebel medruwe putra selami 42 rahina sane istri, sane lanang akepus odel.
 3. Sebel pengantenan, sadurung mewidi widana.
 4. Sebel mederuwe kaluwarga kepademan utawi kelayu sekar, kantos mesapuh-sapuh.
 5. Yan pengantenan sane sampun mebea kala dados wantah ring jaba, nanging durung dados kepura.
 6. Yan sampun mewidi widana, dados ke pura.
 7. Sedurung meupakara, polih luput ayah-ayahan ring pura.
 8. Risampun puput sengker, durung keupakara pewidi widanaan wenang kekedanda manut perarem.
 9. Yan ngantos medruwe putra, lanang utawi istrinia rawuh keputra tan dados ke pura.
 - b. Makta sahanan barang sane kesinanggeh ngeletehin.
 - c. Sato agung sejawaning / ritatkala mapapada.
 - d. Mabusana sane tan manut tata caraning ke pura, sedurung polih uak-uakan (pituduh) prajuru / dulun desa.
 - e. Sane ngelaksanayang gamya gemana tan dados ke pura.
 - f. Yan hana anglaksanaken gamya gemana, wenang kepalasang tur marisuda raga muah merayascita Desa Adat.
 - g. Cuntaka dening salah timpal wenang marisuda raga rawuh kejagat utawi Desa Adat, sedurung punika tan dados ngeranjing ke pura-pura.
 - h. Sato agung sane tan dados ke pura, inggih punika sehanan wewalungan.
 - i. Cuntaka dening mitra ngalang, sedurung sah wenten ngangkenin tur durung kewidhi widanain tan dados ke pura.
2. Pratingkahing tan wenang ring pura kadi ring sor :
 - a. Mesumpah utawi mecoran sejawaning pituduh prajuru.

- b. Mekobetan, mesesenengan, mekolem lanang istri, mebacin, mewarih, nyecepin anak alit, nyangsang busana, ujar ala, mecikang pusungan (ritatkala mejejahitan patut ngelung busung macongger lidinnia).
 - c. Mungguh tedun pelinggih sejawaning pituduh prajuru.
 - d. Mangan kinum ngantos ketaluhan, lan sehananing jejuden.
3. Sang memurug kecaping ajeng, keni pamidanda tur pemerayascita sepatutnia.

Pawos 48

1. Yan hana wong kerawuhan ring pura, kengin kepintonin prade rumasa kesumangsayan, yan tan wiakti wong inucap kesisipang tur keni denda manut perarem.
2. Prade kahyangan ketiben sengkala minekadi panca baya, pemangku gelis atur supeksa ring Prajuru / Dulun Desa mangda marumang desa tur ngewentenang Pamarayascita sepatutnia.
3. Ritatkala Galungan patut :
 - a. Ritatkala Anggara Wage Dunggulan, ngawit merayascita raga (mabia kala) tur ngunggahang penyejer daksina ring Kembulan, wenang apasang penjor tur medaging sanggah meganda wari.
 - b. Ritatkala rahina Buda Kliwon Dunggulan indik pemargi ring paumahan ngantosang puput ring kahyangan tiga desa utawi ring dadia pemerajan soang-soang.
4. Ritatkala Kuningan pemarginnia pateh kadi ring Galungan.
5. Ring rahina Saniscara Umanis Watugunung patut ngaturang piodalan Saraswati megenah ring pelinggih Padmasari.
6. Ritatkala ngaturang yadnya ring pura Desa patut meduluran tetangguran lan warga sari.
7. Yan hana sejeroning palemahan Desa Adat Tihingan ketiben kesengkalan minakadi lulut lan sane sewosan sane ketiben utawi sane manggihin patut ngawentenang pamarisuda utawi ngaturang ring prajuru Desa Adat.

Palet 2

RESI YADNYA

Pawos 49

1. Prajuru yogya nuntun krama Desa misinggihang / mikukuhang sang para wiku, para Pemangku lan sane sewosan indik sesana sane manut linggih Ida.
2. Krama Desa patut ngaturang punia bakti ring Ida Peranda ritatkala wus ngaturang pemuput yadnya.
3. Karama Desa patut meteleb nunas panugrahan ring Ida Sang Wiku muwah Sang Sujanasana presida mawesana kasutreptianing desa manut kecaping Agama.

Pawos 50

Petitis lan olih-olihan Pemangku :

- a. Kaping singgih krama manut linggih tur sesanannia.
- b. Luput ayah-ayahan Desa manut perarem.
- c. Luput peson-peson utawi urunan ritatkala wenten upacara ring pura-pura.
- d. Polih pahpahan sesari manut perarem.
- e. Patut polih pengolem ritatkala wali (teges pengolem) : rayunan meulam kapih mewadah taledan medaging canang utawi canang sari. Teges rayunan : Rayunan sareng ulam selaman mewadah limas meduluran lekesan.
- f. Pawintenannia kesanggra antuk Desa Adat.
- g. Busana arangsukan kesanggra antuk desa Adat amasa apisan tatkala wali ring Pura inucap.
- h. Upakara pitra yadnya / atiwa-tiwannia riwekas sepatutnia kesanggra olih Desa Adat.

Pawos 51

Ngentosin Pemangku :

1. Ngentosin Pemangku mawiwit sangkaning kadi ring sor :
 - a. Pemangku seda.
 - b. Pemangku malih ngalap rabi, yan tan kesungkemin olih krama Desa.
 - c. Pemangku kewusanang olih Krama Desa sangkaning kebuktian melaksana dusta.
2. Yan hana Pemangku kewusanang sangkaning melaksana dusta yadian sangkaning pikayun ngeraga pacang merarian patut keni pamidanda ngewaliang pemereteka pawintennia manut perarem.

Pawos 52

1. Sedurung polih keputusan saking prajuru Desa pemangku tan dados ngemargiang yadnya.
2. Prejuru Desa patut ngawas / nitenin tur ngabih para pemangku ritatkala ngewentenang yadnya.

Palet 3

PITRA YADNYA

Pawos 53

1. Sahananing upakara pemereteka wong lampus kebawos Pitra Yadnya minakadi : meresihin sawa, mendem sawa, ngeseng (atiwa-tiwa), ngerorasin rawuh melinggihang ring parahyangan dewa sang pitra.
2. Mendem sawa utawi ngeseng :
 - a. Genah mendem utawi ngeseng ring Setra ugi.
 - b. Pemargi mendem utawi atiwa-tiwa manut pedewasan medasar penugrahan Ida Peranda (Sang Sulinggih) / Sang Sujana taler nganutin desa kala patra manut dresta.
 - c. Ida Peranda polih linggih manut dresta.
 - d. Mendem, atiwa-tiwa miwah pengutangannia tan kelugra ring rahina : pasah, prewani, purnama, tilem, semut sedulur, pepedan, rahina ring Kahyangan Tiga.

- e. Yan prade sang kelampusan kewentenannia kobet, kelugra mekingsan pemargine selisiban tan nyuwarayang gendongan tan paupakara tan meprakpak, tan akekidungan tur ngangge gegemuk. Pemeretakan sang kelampusan inucap kelaksanayang ring panemayan padewasannia manut panugrahan Ida Peranda (Sang Sujana).
 - f. Yan hana krama kelampusan arahina sedurung wali ring Kahyangan Tiga sane keni sebelan waline durus memargi, sakewanten pemargine mendem mangda puput ngaturang wali, Ida Bathara nyejer arahina raris masineb.
 - g. Tan dados nekung sawa langkungan ring pitung rahina.
 - h. Mendem sawa tan kelugra narug lan ngelangkar gunung.
 - i. Yan hana krama kelampusan ngawit lampus ngantos pitung rahina tan hana dewasa mendem, kepatutang mekingsan, tan nyuarayang kulkul taler tan maupakara ring setra.
3. Pura Desa sane keni kesebelan, kelayu sekaran wantah Pura Puseh.
 4. Wates kelayu sekaran (sebel) lan pemerayascitanya sekadi ring sor :
 - a. Seda mependem (kawenang), sane ngarepin sebel 11 (solas) rahina, sebel Desa 3 (tiga) rahina.
 - b. Seda makta mala utawi kabebeng, sebel desa tigang rahina, sane ngarepin 42 rahina.
 - c. Yan hana karya Pitra Yandya, cuntakannia ngawit saking ngendagin / ngulapin sawa, sampun manjing sebel desa, ngantos 3 (tigang) rahina wus karya.
 - d. Yan hana Pitra Yadnya dadakan, sang mekarya patut ngawentenang caru ayam brumbun ring Setra lan, ring pempatan desa wus karya.
 - e. Yan karya mungkah patut ngaturang pecaruan amanca ring setra, caru brumbun ring pempatan.
 - f. Sahananing kecuntakan sane nyuwarayang gendongan patut ngaturang pemerayascita gendongan.
 - g. Indik tetaneman mangda ngangge gegumukan antuk rimbagan mekadi dresta.
 5. Yan hana pendeman ring Desa Adat Tihingan jaga keabenang ring jaba desa, patut keni upakara mungguing penanjung batu manut perarem.

Pawos 54

1. Prade wenten wang lampus sangkaning ulah pati, salah pati kengin kebakta budal tur kesanggra antuk banten pengulap lan penebusan upakara pemeretakannia nganutin panugrahan Ida Pedanda.
2. Yang hana wang istri mobot lampus, tan wenang kependem sedurung bobotannia embas.

Pawos 55

1. Sejeroning me Agama Hindu, yan hana wang tan mekrama Desa Adat Tihingan kelampusan tur pacang kependem ring setra Desa Adat Tihingan patut :
 - a. Sedurung patut atur piuning nunas kebebasan ring Kelian / Bendesa Adat.

- b. Wewanengan mendem wantah dasa masa (10) tahun.
 - c. Keni penanjung batu manut perarem saha upakara sepatutnia.
 - d. Tan polih penyanggran krama Desa.
 - e. Indik pemargine mendem manut dresta Desa Adat Tihingan.
2. Yan hana wang tan mekrama Desa Adat Tihingan pacang keabenang ring setra Adat Tihingan patut :
 - a. Sedurunge patut matur piuning nunas kebebasan ring Kelian / Bendesa Adat.
 - b. Keni pinukun setra manut perarem.
 - c. Keni pemerayascita lan pecaruan ring wawengkon Desa Adat Tihingan manut dresta.
 - d. Tan polih penyanggran saking krama Desa.
 3. Yan wang mapinunas kadi kecap ring ajeng pacang mendem utawi ngaben Kelian Adat patut marumang Krama Desa Adat tur nguningayang pinunas utawi pemargin wang inucap.
 4. Yan hana wang saking dura desa pacang kepuputang ring desa Adat Tihingan mendem utawi ngaben olih warisnia sane mekrama ring Desa Adat Tihingan kedadosang nanging ken i penukun setra / penanjung batu manut perarem tur polih penyanggran krama sepatutnia.
 5. Yan hana wang saking dura desa pacang kepuputang ring Desa Adat Tihingan mendem utawi ngaben olih tunggalan dadiannia sane mekrama ring Desa Adat Tihingan kedadosang, nanging ken i penukun setra / penanjung batu manut perarem, tur tan polih peputusan / penyanggran krama.
 6. Yan hana wang tan mekrama Desa Adat Tihingan, tan me Agama Hindu yan prade kelampusan tan kewenangang mendem ring Setra Desa Adat Tihingan.

Pawos 56

Swadarmaning Krama ritatkala kelayuan :

- a. Krama sane medruwe kelayuan patut digelis mepungu atur ring Kelian / Bendesa Adat nunas tetimbang indik tetujon pemargi manut kewentenannia.
- b. Prajuru maritetes pemargin sang kelayuan manut kewentenannia tur nyuwarayang gendongan.
- c. Prade pacang mependem Krama Desa Adat patut sayaga nedunin tur ngerombe sahananing karya sang kelayuan manut dresta.

Pawos 57

Tata trepti ritatkalaning memargi ngantar sawa ke setra :

- a. Rikalaning nganter sawa ke setra, seluiring sane nututin tan dados ngelangkungin sawa.
- b. Pemargine mangda trepti tur dabdab tan wenang mewig-wigan utawi ngarap apan tan manut ring putusan Parisada, napimalih ngerusak sekadi : wadah, pemereman, sawa miwah sane lian-lianan ngantos ngewetuang pekewuh ring sang madruwe kelayuan. Yan hana krama desa memurug kecaping ajeng wenang ken i pamidanda manut perarem.
- c. Mungguing pemargine ke setra nenten dados ngerihinin sawa, sejawaning sane makta upakara patut ngeihinin ring sawa.

- d. Krama Desa sane nututin patut mebusana adat.
- e. Sesampune rawuh ring setra tan dados metinggal sedurung wenten atur saking Prajuru.

Pawos 58

Tata cara ngangge setra utawi tunon :

- a. Sang pacang ngangge setra utawi tunon patut nunas kebebasan saking Prajuru Adat.
- b. Tatane ngangge setra utawi tunon manut kadi dresta miwah pituduh Prajuru inucap.
- c. Wang desane, sami mangda nitenin, mangda sahananing leteh setrane tan wenten ngelalah, kebakta ke desa pekraman, napimalih ke Kahyangan.
- d. Wang desane sami tan dados ngerereh barang sane kebawos leteh ke bakta ke pekraman utawi ke carik.
- e. Yening pelebon / ngagah sawa ring setra nganutin panugrahan Sang Sujana :
 - 1. Sane kebawos leteh : sahananing upakaraning sawa, Nyewasta, Yama Tatwa.
 - 2. Upakara sane tan patut kewaliang ke desa inggih punika : Bale lunjuk, Rompok, Wadah, tiosan ring punika dados kewaliang nanging patut meperayascita.

Pawos 59

- 1. Indik pemargin atiwa-tiwa manut dresta agama sane kepatutang pemarginyane minakadi : Nyawa prateka, Nyawa Resi, Mranawa, nyewasta, Yama Tatwa.
- 2. Pemargin atiwa-tiwa manut masa, sekadi ring sor :
 - a. Pemargin atiwa-tiwa manut sasih, 3 masa apisan sane ngemarginin mungkah, sejawaning wenten pituduh saking Parisada.
 - b. Yan dadakan jaga ngelebuhan tan ngangge sasih lan masa, nanging manut pedewasan.
 - c. Pemargin ngirim utawi ngelanus mangda sinarengan manut perarem.

Palet 4

MANUSA YADNYA

Pawos 60

- 1. Manusa Yadnya inggih punika : sahananing upakara lan dharmaning manusa, ngawit saking patemon kama bang kelawan kama petak sejeroning garba, kantos selawasnia maurip.
- 2. Upakara ring ajeng luire :
 - a. Pawiwahan
 - b. Megedong-gedongan
 - c. Wawu embas
 - d. Kepus odel
 - e. Mayusa roras (12) rahina

- f. Tutug kambuhan (42) rahina
 - g. Nelubulanin (tigang sasih)
 - h. Aoton (nem sasih)
 - i. Tumbuh gigi (ngempugin)
 - j. Mekutang bok (tigang weton)
 - k. Mekupak (meketus gigi)
 - l. Mungah deha utawi teruna
 - m. Mepandes (metatah)
 - n. Pemerasan utawi meras sentana
3. Upacara inucap ring ajeng nganutin kecapin Agama : nista, madya, utama, pemargine nganutin dresta miwah sima ring Desa Adat Tihingan.
4. Indik upakara pawidhi widanaan pawiwahan sane utamaning nista inggih punika : Ayam amanca, maduluran upasaksi ring sang ngawiwenang, ngaturang piuning ring Pura Dalem tur nunas Tirta.

Palet 5

BHUTA- YADNYA

Pawos 61

Bhuta Yadnya inggih punika : sahanan upakara lan upacara pamoghakala ring Pertiwi lan Kahyangan saha upacara-upacara ring Bebutan.

- 1. Upacara Yadnya Sesa / Mejot-jotan
- 2. Upacara Pecaruan luire :
 - a. Eka sata
 - b. Panca sata
 - c. Panca sanak
 - d. Resi gana
 - e. Panca kelud
 - f. Melabuh gentuh
 - g. Tawur Agung
- 3. Tilem kesanga kewentenan “Tawur Kesanga” ring pempatan Desa Adat Tihingan.
Ageng caru : amanca sata, tur Prajuru nunas tirta ring Kahyangan utawi peyadnyan Banjarangkan / Klungkung manut tetiwak saking Parisada.
- 4. Pecaruan masa kemargiang ritatkala nemonim sasih kapat.
Ageng caru : manca sata, tur nunas tirta ring Kahyangan Tiga.
- 5. Sejeroning munggah ring ajeng malih pabiakala marep ring manusa manut wigunannia.
- 6. Ritatkala mecaru patut ngemargiang perang sata.

Pawos 62

Upacara Tilem Kesanga (Tawur Kesanga) patut ngelaksanayang sekadi ring sor :

- a. Mekiis ke segara, tata cara manut dina lan dresta.
- b. Rawuh saking mekiis, Ida Bhataran nyejer ring pempatan agung Desa Adat Tihingan.
- c. Pecaruan kewentenan ring pempatan Desa Adat Tihingan (Tawur Kesanga).
- d. Ring swang-swang peumahan nganutin tetiwak saking Parisada.
- e. Ngewentenang pengerupukan mebuu-buu kapidababin olih Prajuru muwah pecalang.
- f. Ring rahina Penyepian patut ngemargiang merata penyepian sekadi :
 - a. Amati geni
 - b. Amati karya
 - c. Amati lelungan
 - d. Amati lelangan
- g. Pemargin merata Penyepian nganutin desa, kala, patra saha ketuntun olih Prajuru utawi Pecalang, ngawit penyepian macihna pesuaran kulkul (gendongan).
- h. Sane memurug merata penyepian patut keni pamidanda manut perarem, sejawaning sane polih wak-wakan manut kekobetannia saha ilakita lingga tangan Prajuru.
- i. Ritatkala ngembak merata penyepian mecihna antuk pasuaran kulkul.
- j. Riwus rahina nyepi (benjange) makacihna pengawit Icaka Warsa patut swang-swang warga desa sami ngaksamayang raga (Sila Krama).

SARGA V

SUKERTAN TATA PAWONGAN

Palet 1

INDIK PAWIWAHAN

Pawos 63

1. Pawiwahan inggih punika panunggalan purusa lan predana (lanang-istri) melarapan antuk suka cita kedulurin antuk upasaksi sekala lan niskala.
2. Pidabdab pawiwahan ring Desa Adat Tihingan, kemanggehang pemargin purusa, kepatut sang kepurusa sane ngalap rabi, tur kepaumahang ring sang purusa.
3. Pemargin pawiwahan wenten palih-palihan ipun luire :
 - a. Pepadikan (Kemanggala) antuk pekraman.
 - b. Merangkat (ngerorod) memargi riin selisiban, wus punika wawu kekrunayang.
 - c. Nyeburin, sang wadon meraga purusa kerajegang sentana marep, sane lanang meperagayan istri.
4. Pidabdab sang pacang mawiwaha luire :
 - a. Sane sampun munggah teruna utawi dehe, yusa sang teruna 21 (kalih dasa siki) masa, yusa sang dehe 19 (siang olas) masa.

- b. Sangkaning suka cita lan tan keparikosa.
 - c. Yan ngambil sewos Agama, patut kemenggala antuk bebanten, nganutin kecaping Agama Hindu.
 - d. Mangda nganutin Undang-undang Perkawinan sane kawentenang antuk Pemerintah Agung.
5. Yan tan satinut kadi kecaping ajeng, tan kasinanggeh sah, tur kepalasang raris keni pamidanda manut perarem.

Pawos 64

1. Pawiwahan sane sampun puput, kesahang ring Desa Adat Tihingan, luire :
- a. Pemargi pawiwahan sampun nganutin pidabdab pawiwahan ring Desa Adat Tihingan.
 - b. Sampun mawidi widana sanistane ngangge ayam amanca warna tur nunas Tirta ring Pura Dalem, selamin ipun 42 (petang dasa kalih) rahina nembenin suaran kulkul pengambilan rabi.
 - c. Kesaksinin antuk Prajuru Adat lan Pemerintah.
 - d. Sampun munggah ring ilikita ring Desa Adat Tihingan utawi dinas seosan.
 - e. Nawur prebeya upasaksi meserana antuk Pejati.
2. Sane kebawos tan patut utawi tan sah luire :
- a. Pepaksaan, tan pada rena.
 - b. Durung tutug yusa.
 - c. Tan paupasaksi.
 - d. Tan pailikita / pinaka bukti.
 - e. Gamy gemana.
 - f. Salah timpal.
 - g. Miwah sane tan manut sekadi gaguat pemargi pawiwahan sekadi kecap ring ajeng.

Pawos 65

Tata cara perabian ring Desa Adat Tihingan luire :

- a. Sang pacang merabian (ngewarangang) keluwargannyane patut mapisedek ring I Bendesa Adat utawi Prajuru indik wewarangannya.
- b. Pemargi indik pepadikan :
 - 1. Mekruna ping tiga : ngedih ping kalih, pengambilan.
 - 2. Yan ritatkala pengambilan, wargan sang predana lan purusa, ngerawuhang Bendesa Adat utawi Prajuru pinaka saksi.
- c. Prade ngerangkat utawi ngerorod, sang sane ngambil anak istri patut ngemargiang sekadi ring sor :
 - 1. Mepesedek, tan kasepan ring awengi.

2. Ngewentenang pengelukuan ping tiga manut tata cara, saha dulurannia luire : suar lan pecanangan.
- d. Wus pengambilan yan sampun manut, wargan sang istri mapisedek ring Bendesa Adat utawi Prajuru, jaga nyuarayang kulkul.
- e. Yan sampun ping tiga mekruna, pengeluannia durung patut, wenang sang ngambil rabi mapisedek indik pemarginnia ring Bendesa Adat, wiyadin ring Pemerintah Agung.
- f. Yening wenten wang ngambil istri ngunggahang, kengin sang sane ngambil mapisedek ring Bendesa Adat, nunas mangda mapisedek ring sang mederebe oka istri, taler kewehin rerepi antuk sang alaki-rabi. Kelanturang wadone patut kaupakara patiwangi, katodya antuk Prajuru Desa. Wadone kepegatang wangsa lan wangsa, wus punika wawu pabiyakalaan lan sewosan punika.
- g. Yan wenten wang dura desa ngambil istri saking wewidangan Desa Adat Tihingan, patut wang inucap nawur pesuaran kulkul manut perarem.

Pawos 66

1. Manut ring Undang-undang Perkawinan sane kawentenang saking Pemerintah Agung tur sampun kesungkemin, sang lanang patut merabi asiki, sejawaning wenten pasubayan sane kewehin antuk rabinane sane pinih rihin.
2. Yan wenten jadmata istri deha mobot, patut digelis kesadokang ring Bendesa Adat utawi Prajuru tur digelis kejangkepan antuk I Bendesa Adat ring sang mobotin. Prade sang mobotin tan manut wang inucap keni pamidanda 4.500 (petang tali limang atus) wiji jinah bolong, saha kepatut ngupakara rarene riwekas.
3. Prade tan wenten sane ngangkenin bobotan sang mobot, keluwarganyane patut keni pemerayascita ring Desa Adat lan keni pamidanda manut perarem tur kaupakara rarene manut Agama Hindu. Sane ketuduh mobotin tan ngangken, patut ke Dewa Saksiang.

Palet 2

INDIK NYAPIAN

Pawos 67

1. Sang wus merabian (palas) tan sida malih satinut alaki-rabi kebawos nyapian. Yan wus merabian sangkaning seda, kebawos balu.
2. Sang pacang nyapian sesampune kesahang antuk Pemerintah Agung (Pengadilan) wenang kawedarang ring Desa Adat antuk I Bendesa Adat utawi Prajuru.

Pawos 68

1. Sulur pacang palas merabian wenten sangkaning manut Undang-undang Perkawinan sane kewentenang antuk Pemerintah Agung.

2. Yan riwekas sang nyapian malih adung tur mepawiwahan, patut keni pamidanda manut paswara 2.500 (kalih tali limang atus) wiji jinah bolong.

Pawos 69

1. Balu luh katinggal lampus antuk suwaminnia utawi balu sane pecak nyeburin patut ngemargiang swadarma kadi ring sor :
 - a. Ngemanggehang kepatibrataan tan dratikrama.
 - b. Ngemargiang sahananing ayah krama.
 - c. Ngeraksa tur ngutsahayang lan miara sahananing wewarisan lan sentanannia.
 - d. Tan dados ngadol wewarisan sadurunge polih wak-wakan saking kaluwargan rabine saking purusa.
2. Balu sane tan pageh ring swadarma luire :
 - a. Metingkah drati krama, muwah sane sewosan.
 - b. Matilar tan pasedek kantos langkung 6 (nem) sasih.
 - c. Lempas ring swadarmaning balu, utawi salah prawerti.
3. Balu sane tan pageh kadi kecaping ajeng wenang katundung olih kaluwargan sang purusa saha tan polih pah-pahan waris, tur sampun polih pengesahan saking Pemerintah Agung.
4. Prade wenten balu tanpa sentana katundung olih wargannia kapurusa patut polih pah-pahan peguna kaya, tur taler mangda kesahang olih Pemerintah Agung.

Palet 3

INDIK SENTANA

Pawos 70

1. Mungguhing sentana wenten kaucap : preti sentana, sentana rajeg, lan sentana paperasan.
2. Preti sentana inggih punika : sentana sane metu saking pawiwahan kepatut.
3. Yan wenten perabian sane tan manut jantos ngewetuang sentana, mangda tan kaucap astra utawi bebinjat patut kemenggala antuk upakara.
4. Prade pewiwahane tan ngewetuang sentana, kengin ngedih sentana peperasan saha polih pengesahan saking Pemerintah Agung.
5. Sentana rajeg inggih punika : preti sentana wadon (predana) sane kemanggehang lanang (purusa) tur risampun ngelaksanayang pawiwahan keceburin.
6. Sang sane dados kemanggehang sentana rajeg inggih punika :
 - a. Preti sentana wadon, patut kerajegang wantah adiri.
 - b. Sampun kemanggehang dados preti sentana lanang (purusa).

- c. Pawiwahan keceburin, keutamayang antuk jadmā sane me Agama Hindu utawi jadmā sane me Agama sewosan sane sampun ngelaksanayang pamarisuda raga utawi sudawadani.
- d. Sane ngemanggehang sentana rajeg patut mapisadok ring I Bendesa Adat tur I Bendesa Adat patut nyiarang ring Desa Adat.

Pawos 71

1. Yaning wenten sinalih tunggil I Krama desa jagi ngangkat sentana patut ngemargiang arta berana pemerasan, saha kesaksiang skala lan niskala, tur polih pengesahan saking Pemerintah Agung.
2. Sapisira ugi pacang ngedih sentana patut mapesadok dumun ring Bendesa Adat.
3. Bendesa Adat digelis nyiarang ring Krama Desa sami. Sang rumasa tan lila patut nyadokang ring Bendesa Adat sejeroning 3 (tigang) sasih.
4. Yening sampun rawuh sengker ipun tigang sasih, irika I Bendesa Adat mawosin utawi ngicenin pamutus manut sekadi kawentennia melarapan saking pengesahan Pemerintah Agung.

Pawos 72

1. Sane patut keperas anggen sentana kadi ring sor :
 - a. Sang keperas kepatut sane me Agama Hindu.
 - b. Mautama saking waris pancer kepurusa.
 - c. Yening tan wenten saking pancer kepurusa kengin mewiwit saking kaluwarga wadu tunggal Paibon.
 - d. Sinalih tunggil mewiwit saking keluwarga tunggal Sanggah utawi Merajan Paibon lan Dadya.
 - e. Yening tan wenten sekadi kecaping ring ajeng, dados ngedih anak sewos, yening tan wenten sang kekobetan.
2. Paperasan punika sinanggeh sampun puput tur patut, yening sampun mecihna :
 - a. Pawidi widanaan peperasaan.
 - b. Kesaksiang antuk Bendesa Adat utawi Prajuru, saha kesiarang ring paruman desa.
 - c. Wenten ilikita dudonannia minakadi antuk artha berana pemerasan lan sewosan punika.
3. Yening jagi ngawentenang pemerasan kepatutang nyelosin patus sang ngedih.
4. Yening pacang meras sentana tan kawenangang sane sampun bulangkep utawi sampun mawiwahan.
5. Meras sentana kengin langkungan ring adiri, lanang wiyadin wadon.

Palet 4

INDIK WARISAN

Pawos 73

1. Sane kasinanggeh warisan inggih punika : Tetamian artha berana saha ayah-ayahan ngupadi sukertan sekala lan niskala, saking kaluhurannia marep ring turunannia.
2. Sane kaucap warisan luire :
 - a. Duwe tengah, karang paumahan, pemerajan.
 - b. Peguna-kayaan, tadtadan, jiwadana lan utang piutang.
 - c. Wenten arta berana muwah tetegenan utawi ayah-ayahan merupa warisan.
3. Sane kebawos waris inggih punika :
 - a. Preti sentana lanang utawi wadon.
 - b. Sentana rajeg.
 - c. Sentana peperasan lanang utawi wadon.
4. Prade tan wenten sekadi ring ajeng kang sinanggeh waris luire :
 - a. Turunan purusa pernah ngunggahang sekadi : rerama, rerama dia, rerama dimisan lan rerama dimindon.
 - b. Turunan purusa pernah kesamping mekadi : semeton, keponakan, misan, mindon.
 - c. Yan tan wenten kadi kecaping ajeng dados kewaris olih tunggal pedadian manut reruntutannia.

Pawos 74

1. Swadarmaning waris patut nerima saha ngusahayang tetamian, ayah-ayahan saking kaluhurannia mekadi ngerombe sanggah, merajan, Pura dadia, Pura Kahyangan saha pekarangannia.
2. Ngabenang sang kewarisin saha ngelanturang upacara Pitra Yadnya sepatutnya.
3. Naurin utang-piutang sang kewarisin, pemekas utang ring Desa wiyadin hutang ring Pura lan hutang-hutang sane sewosan.

Pawos 75

1. Pengepahan waris kangkat kemargiang sekadi ring sor :
 - a. Risampun ngelaksanayang Pitra Yadnya lan utang-piutang sang kewarisin buntas ketawur.
 - b. Warisan sangkaning artha berana peguna kayaan keepah pada.
Karang ayahan Desa keemong antuk warisane jumenek ring karang inucap.
2. Sinalih tunggil waris ring ajeng tan polih pah-pahan wewarisan prade ipun.
 - a. Alpaca guru rupaka utawi guru swadiaya.
 - b. Merupa sentana rajeg sane sampun kesah mawiwaha.
 - c. Merupa sentana sane mewiwaha nyeburin kepekurenan lian.
3. Sentana waris sane nilar Agama Hindu tan kangkat polih pah-pahan waris.

4. Yening wenten sentana wadon ngelaksanayang lokika Sanggraha (nyele polah) mewastu mederebe pianak kewastanin sentana alpaka guru. Yan pianak ipune keangkenin ring pengelingsirnia, kengin I Pianak punika ngewaris pegunakayaan reramane wadon kemawon.
5. Sane kangkat ngewaris pemupu kemawon :
 - a. Balu wadon.
 - b. Balu lanang sane mawit saking pawiwahan nyeburin.
 - c. Sang mulih kedeha, seantukan ring pewiwahan dumun sampun kaucap ninggal kedaton.
6. Sekantune maurip I Pengelingsir kangkat ngewehin jiwadana, tadtadan utawi bekel makecihna paweweh ring okane sane kesah mewiwaha.

Pawos 76

Prade sajeroning keluarga wenten waris langkung ring adiri patut :

- a. Kewentenang paiguman indik pedum waris inucap.
- b. Yening tan prasida kepuputang, ketunasang tetimbang ring Bendesa Adat, taler yan tan lila kengin nunasang ring rumawos (Pengadilan).

Pawos 77

Prade wenten karang kaputungan, wenang I Bendesa Adat mawosin tur nureksa sila-silania saha nibakang karang punika ring :

- a. Waris saking kepurusa.
- b. Pepernahan kesamping, yening tan wenten pepernahan, kepatutang ring pedadian manut reruntutannia.
- c. Yening tan wenten kadi kecaping ajeng wawu ketiwakang ring sang tan medruwe paumahan sane kasinanggeh ngarep, mapetunggalan Desa Adat Tihingan muwah me Agama Hindu. Sang ketiwakin karang punika wenang mereteka sang pecak mederebe karang inucap, manut kecaping Agama Hindu.
- d. Deha tua sane rajeg wenang polih warisan keh ipun asuhun.

SARGA VI

WICARA LAN PAMIDANDA

Palet 1

INDIK – WICARA

Pawos 78

1. Sang wenang mawosin mekadi mutusang wicara ring Desa Adat Tihingan inggih punika : Prajuru utawi Dulun Desa sang kapinanggeh kertha desa.
2. Putusan penepas nganutin awig-awig desa, petitis lan pemikukuh desa.
3. Prade wicara punika tan presida molihang pemutus ring Desa, sang mawicara kengin nunas pamutus ring sang Angawa Rat.

Pawos 79

1. Sahananing wicara sane mewiwit saking laksana corah, baya, nungkas sedaging awig-awig sane mewesana ngaruareng jagat, patut digelis kebawosin antuk Prajuru Desa Adat, banjar utawi Tempekan tur keni pamidanda manut perarem.
2. Sejabaning wicara sekadi kecaping ajeng, patut nyantosang pesadok saking sang nunas bawos.
3. Penepas patut pastika, nyantenang iwang patut melarapan antuk Catur Deresta : (Sastra deresta, Purana Deresta, Loka Deresta lan Desa Deresta) muwah tan maren nepek ring Tri Premana : (Saksi, Ilikita lan Bukti).

Palet 2

INDIK PAMIDANDA

Pawos 80

1. Krama Desa, Banjar utawi Tempekan wenang niwakang pamidanda ring wanga sane sisip.
2. Peniwak pamidanda inucap, kelaksanayang olih Bendesa Adat, Kelian Banjar utawi Kelian Tempek.
3. Bacak-bacakan pamidanda luire :
 - a. Ayah-ayahan panukun kesisipan.
 - b. Danda Artha (dedosan) saha penikelnia, utawi panikel paturunan.
 - c. Pengupakara / penyangaskara.
 - d. Merangdain.
 - e. Kedaut tanah utawi karang ayahannia.
 - f. Lan pamidanda-pamidanda sewosan.
4. Geng alit pamidanda sane ketiwakang, patut mesor singgih manut ring kasisipannia, tur kaputusang ring paruman olih I Krama Desa, Banjar utawi Tempekan.
5. Sahanan jinah utawi rajaberana wit saking pamidanda, ngeranjing dados druwen Desa, banjar utawi Tempekan.

Pawos 81

1. Yan prade wenten sinalih tunggil krama mautang ring desa wiyadin antuk dedosan, peturunan lan pamidanda, yan wenten pajar wak penanggeh ring I Prajuru Desa, polih sengker asasih, yan lintang ring asasih taler nenten nawur wenang manikel, yening nikel taler nenten nawur wenang kerangdain antuk I Krama Desa, Banjar utawi Tempekan.
2. Tata cara ngelaksanayang rerangdaan sekadi ring sor :
 - a. Medulurin antuk piteket saking Prajuru marep ring sang pacang kerangdain.
 - b. Pemargin ngerangdain kelaksanayang olih I Prajuru kesarengin antuk Krama Desa, Banjar utawi Tempekan.
 - c. Sang ngerangdain mangda sangkaning darsana, ngambil rerangdaan utawi nyawenin barang utawi tanem tuwuh, lan wewalungan manut ring hutang sang kerangdain.
 - d. Rerangdaan keunggahang ring ilikita tur kesaksiang.
 - e. Prajuru miteketin sang karangdain mangda digelis nebus druwennia sedurung wenang awuku.
 - f. Yening sampun awuku nenten ketebus, wenang kelelang, lelangan punika keanggen nuku hutangnia ring desa, Banjar utawi Tempekan tur kewewehin solasan, sisannya kewaliang ring sang kerangdain.
3. Tan kepatutang / tan kewenang ngerangdain saluiring barang sane patut kesuciang manut Agama, miwah mademang pengupajiwa sang karangdain.

Pawos 82

1. Prade sang kerangdain ngewara utawi ngalengin pemargin inucap, mewasta tan nganutin daging awig-awig lan lempas ring swadarmaning krama, wang inucap wenang kedaut pipilnia ring desa, Banjar, utawi Tempekan antuk I Krama, wang inucap kebawos nora tan polih pengayoman krama Desa, Banjar utawi Tempekan tur tan kedadosang ngangge sehananing serana sane kedruwe antuk desa sane wenten ring wewidangan Desa Adat Tihingan.
2. Pamidanda sisip sekadi ring ajeng presida purna buntas, yang sang sisip sampun :
 - a. Nunas geng pengampura ring Krama Desa, banjar utawi Tempekan, riantukan purun ngwak pasubayan (pasuara ring perarem) maduluran antuk banten Pras Pejati.
 - b. Nawur pamidanda pengwak suara, gung artha duk pacang kerangdain tur mapeweweh solasan manut laminnia mautang tur wang inucap mewali keterima sekadi krama Desa, utawi Tempekan.

SARGA VII

NGUAK NGUWUHIN AWIG-AWIG

Pawos 83

1. Nguwak kalih nguwuhin awig-awig puniki patut kelaksanayang antuk paruman Desa Adat.

2. Paruman inucap patut kedarin antuk gilik saguluk miwah pemargin perarem Krama Desa sumuyub jaga nguwak kalih nguwhin awig-awig manut babuatannia.
3. Pamutus bebawos prasida puput yan sampun kramane / Prajurune gilik seguluk, utawi kengin mejalaran pesuara (wewilangan suara).
4. Yan medasar wewilangan suara gaguatnia sekadi ring sor :
 - a. Krama desa sane parum sanistannia kalih pah tiga akweh Krama Desa Adat.
 - b. Suara / wewilangan suara sane nganutin sanistanne apahan langkung adiri saking wewilangan suata sane sareng parum.

Pawos 84

1. Wiwit paruman indik ngwak nguwhin awig-awig kadi ring ajeng kengin kemedalang antuk I Bendesa, kelian Banjar / Tempekan, Krama niri-niri sinarengan.
2. Awig-awig puniki kelingga tanganin olih Bendesa, Kelian Banjar / Tempekan, Sekehe-sekehe kesaksinin antuk Klian Dinas miwah Perbekel (Kepala Desa) sane ngewidangin Desa Adat Tihingan.

SARGA VIII

P A M U P U T

Pawos 85

1. Awig-awig puniki kewastanin “Awig-Awig Desa Adat Tihingan”.
2. Awig-awig puniki kemargiang ngawit saking keraremin tur kemanggehang antuk Desa Adat Tihingan.
3. Awig-awig Desa Adat Tihingan punika, manggeh tur kelaksanayang ring sejeroning wewidangan Desa Adat Tihingan sekadi inucap ring ajeng.
4. Awig-awig Desa Adat Tihingan puniki nganinin sehananing warga lan Krama Desa Adat Tihingan miwah sehananing sane kakuub antuk Desa Adat Tihingan.


Pawos 86

1. Saluiring pemargi sane wenten sadurung awig-awig puniki kasungkemin presida memargi sepatutnia manut Tri Pramana.
2. Saluiring pemargi sane jagi rawuh patut keanutang ring sedaging awig-awig puniki.
3. Saluiring pemargi pekraman sane durung kebawos / durung munggah ring sejeroning awig-awig puniki patut kelaksanayang manut tata cara sane sampun ketah memargi kedulurin antuk Perarem Desa Adat.

Pawos 87

1. Awig-awig puniki kesungkemin duk perarem Krama Desa Adat Tihingan ring rahina Saniscara Kliwon Wayang, sasih Kedasa / Purnama Kedasa Saka 1910 tanggal masehi 2 – 4 – 1988, magenah ring Balai Desa Adat Tihingan.
2. Awig-awig puniki kalingga tanganin olih Bendesa Adat, lan penyarikan Desa Adat Tihingan maka cihna pemutusan.
3. Kakukuhang olih Bapak Bupati Kepala Daerah Tingkat II Klungkung.

PENYARIKAN,



(ID. B. NGR. PARWATA, BA)

BENDESA ADAT,




(I W. WASPA SUSANA)

KESAKSIANG/KEKUKUHANG

OLIH



BUPATI KEPALA DAERAH KABUPATEN
DAERAH TINGKAT II KLUNGKUNG,



(dr. TJOKORDA GDE AGUNG)

PANITIA PENYURATAN
AWIG-AWIG DESA ADAT TIHINGAN

Penasehat	:	1. Bendesa Adat Tihingan 2. I Gst. Ny. Putra, SH 3. I Wy. Redana, SH
Ketua	:	I Kt. Gd. Sudiara, SH
Sekretaris I	:	Id. B. Ngr. Parwata, BA
Sekretaris II	:	I Kt. Sulatra
Bendahara	:	I Md. Sendra
I. BIDANG PARAHYANGAN	:	
Ketua	:	Id. B. Kt. Putra
Sekretaris	:	I Md. Remika
Pelapor	:	Id. B. M. Putra Wijaya
Anggota	:	1. I Gst. Pt. Mangku 2. Jro Mangku Sumindra 3. Jro Mangku Rumben 4. Jro Mangku Melati 5. I Md. Suyasa 6. Id. B. Pt. Lawa 7. I Gst. Ny. Giri 8. I Ny. Minta 9. W. Surena
II. BIDANG PAWONGAN	:	
Ketua	:	I Gst. Pt. Natha Kusuma, Bsc.
Sekretaris	:	I W. Patra
Pelapor	:	I Ny. Arta
Anggota	:	1. Pan Kartika 2. Kt. Windia 3. Pan Agus Hendrawan

4. Pan Pt. Suparta
5. Id. B. Ny. Rata
6. Pan Rai Witari
7. Sang Pt. Gurun Denia
8. I Gst. Md. Sunartha
9. I W. Parna

III. BIDANG PALEMAHAN :

Ketua : Pan Putu Pandia

Sekretaris : I W. Wisada

Pelapor : Pan Pt. Dharma Yuda

Anggota :

1. Pan Luh Gd. Citrawati
2. Pan Pt. Dharma Suyasa
3. Pan Luh Baktiasih
4. Pan Pt. Wedasara
5. Pan Pt. Kariasas
6. Pan Rumanis
7. Pan Ardana
8. Pan Gd. Yusnaya
9. I W. Adnyana